



**KERAJAAN MALAYSIA**

---

**GARIS PANDUAN UNTUK KELULUSAN SEBAGAI  
PENYELESAI DI BAWAH AKTA SYARIKAT 2016**

---

Dikeluarkan Oleh:

**JABATAN AKAUNTAN NEGARA MALAYSIA**

## KANDUNGAN

<b>PERKARA</b>	<b>MUKA SURAT</b>
1. Tujuan	2
2. Punca Kuasa Kelulusan Sebagai Penyelesai	2
3. Perwakilan Kuasa Oleh Menteri Kewangan	3
4. Penetapan Badan Profesional Yang Diiktiraf	4
5. Permohonan Untuk Diluluskan Sebagai Penyelesai	5
6. Pembaharuan Kelulusan Sebagai Penyelesai	10
7. Pembatalan Kelulusan Sebagai Penyelesai	12
8. Tarikh Kuatkuasa	12

## AKTA SYARIKAT 2016 [AKTA 777]

### GARIS PANDUAN UNTUK KELULUSAN SEBAGAI PENYELESAI

#### 1. TUJUAN

Garis panduan ini bertujuan untuk menjelaskan pelaksanaan kelulusan sebagai penyelesaian di bawah Seksyen 433 Akta Syarikat 2016.

#### 2. PUNCA KUASA KELULUSAN SEBAGAI PENYELESAI

2.1 Kelulusan sebagai penyelesaian adalah berdasarkan peruntukan di bawah Seksyen 433 Akta Syarikat 2016 iaitu seperti berikut:-

Seksyen 433(3): “... *mana-mana orang yang merupakan **anggota badan profesional diiktiraf** boleh memohon kepada Menteri yang dipertanggungjawabkan dengan tanggungjawab bagi kewangan untuk diluluskan sebagai seorang penyelesaian*”.

Seksyen 433(4): “Menteri yang dipertanggungjawabkan dengan tanggungjawab bagi kewangan boleh meluluskan mana-mana orang sebagai penyelesaian jika Menteri berpuas hati dengan **pengalaman** dan **keupayaan** orang itu dan selepas pembayaran fi yang ditetapkan oleh orang itu”.

Seksyen 433(4A): “Apa-apa kelulusan yang diberikan oleh Menteri di bawah subseksyen (4) boleh dibuat tertakluk kepada apa-apa had atau syarat yang difikirkan patut dan boleh dibatalkan pada bila-bila masa oleh Menteri melalui penyampaian suatu notis pembatalan kepada orang yang diluluskan itu”.

Seksyen 433(4B): “Tiap-tiap kelulusan di bawah seksyen ini termasuk pembaharuan kelulusan penyelesaian hendaklah berkuat kuasa bagi tempoh dua tahun selepas tarikh pengeluaran melainkan jika dibatalkan terlebih dahulu oleh Menteri yang dipertanggungjawabkan dengan tanggungjawab bagi kewangan”.

Seksyen 433(4C): “Menteri yang dipertanggungjawabkan dengan tanggungjawab bagi kewangan boleh mewakilkan semua atau mana-mana kuasanya di bawah seksyen ini kepada mana-mana orang atau kumpulan orang”.

### 3. PERWAKILAN KUASA

3.1 Melalui peruntukan di bawah Seksyen 433(4c) Akta Syarikat 2016, Menteri Kewangan telah mewakilkan kuasa kepada Akauntan Negara Malaysia bagi urusan permohonan kelulusan baharu, pembaharuan kelulusan dan pembatalan kelulusan sebagai penyelesaian berkuatkuasa mulai 05 Disember 2019.

3.2 Tadbir urus berkaitan kelulusan penyelesaian oleh Akauntan Negara Malaysia ditetapkan untuk dilaksanakan melalui dua (2) Jawatankuasa iaitu :

- (i) Jawatankuasa Kelulusan Penyelesai Syarikat; dan
- (ii) Jawatankuasa Pengawas Juruaudit dan Penyelesai Syarikat

#### 3.3 JAWATANKUASA KELULUSAN PENYELESAI SYARIKAT

3.3.1 Keanggotaan Ahli Jawatankuasa Kelulusan Penyelesai Syarikat terdiri daripada:-

Akauntan Negara Malaysia atau wakil - **Pengerusi**  
Wakil Suruhanjaya Syarikat Malaysia (SSM)  
Wakil Institut Akauntan Malaysia (MIA)  
Wakil Suruhanjaya Sekuriti (SC)  
Wakil Jabatan Insolvensi Malaysia (Mdl)

3.3.2 Bidang kuasa Jawatankuasa Kelulusan Penyelesai Syarikat:-

- i) memastikan calon memenuhi **pengalaman (*experience*)** dan **keupayaan (*capacity*)** yang ditetapkan sebagai penyelesaian;
- ii) menilai dan membuat keputusan terhadap calon yang berkelayakan melalui sesi temu duga; dan
- iii) menimbangkan tempoh menunggu untuk temuduga semula bagi calon-calon yang gagal.

3.3.3 Urusetia Jawatankuasa ini adalah Unit Kawal Selia Juruaudit dan Penyelesai Syarikat, Seksyen Pembangunan dan Pengurusan Strategik, Bahagian Pembangunan Perakaunan dan Pengurusan, Jabatan Akauntan Negara Malaysia.

### 3.4 JAWATANKUASA PENGAWAS JURUAUDIT DAN PENYELESAI SYARIKAT

#### 3.4.1 Keanggotaan Ahli Jawatankuasa Pengawas Juraudit dan Penyelesai Syarikat terdiri daripada:-

Timbalan Akauntan Negara (Korporat) – **Pengerusi**  
Pengaruh Bahagian Pembangunan Perakaunan dan Pengurusan, Jabatan Akauntan Negara Malaysia  
Wakil Suruhanjaya Syarikat Malaysia (SSM)  
Wakil Institut Akauntan Malaysia (MIA)  
Wakil Suruhanjaya Sekuriti (SC)  
Wakil Jabatan Insolvensi Malaysia (Mdi)  
Wakil Bank Negara Malaysia (BNM)  
Pegawai Undang-Undang, Perbendaharaan Malaysia

#### 3.4.2 Bidang kuasa Jawatankuasa Pengawas Juraudit dan Penyelesai Syarikat:-

- i) menentukan dasar-dasar mengenai kelulusan baharu dan pembaharuan kelulusan juraudit dan penyelesai syarikat;
- ii) menimbangkan dan membuat keputusan mengenai laporan aduan dan kes-kes yang dikemukakan terhadap juraudit dan penyelesai syarikat; dan
- iii) mengemukakan syor kepada Menteri Kewangan atau orang yang diwakilkan kuasa bagi kes pembatalan kelulusan seseorang sebagai juraudit atau penyelesai.

#### 3.4.3 Urusetia Jawatankuasa ini adalah Unit Kawal Selia Juraudit dan Penyelesai Syarikat, Seksyen Pembangunan dan Pengurusan Strategik, Bahagian Pembangunan Perakaunan dan Pengurusan, Jabatan Akauntan Negara Malaysia.

## 4. PENETAPAN BADAN PROFESIONAL YANG DIKTIRAF

- 4.1 Seksyen 433(5) memperuntukkan “bagi maksud seksyen 433(3), Menteri yang dipertanggungjawabkan dengan tanggungjawab bagi syarikat (Menteri Perdagangan Dalam Negeri dan Hal Ehwal Pengguna) boleh, selepas berunding dengan Menteri yang dipertanggungjawabkan dengan tanggungjawab bagi kewangan (Menteri Kewangan), menetapkan suatu badan yang hendaklah diiktiraf sebagai badan profesional diiktiraf.

4.2 Warta Kerajaan Persekutuan bertarikh 13 Mac 2018, Bil: P.U.(B) 123 [KPDNKK 600-1/2/4;PN(PU2)740/II] telah menetapkan dua (2) badan profesional berikut sebagai badan profesional yang diiktiraf di bawah Seksyen 433(5) Akta Syarikat 2016 iaitu :

- (i) Institut Akauntan Malaysia (MIA) ; dan
- (ii) Institut Akauntan Awam Bertauliah Malaysia (MICPA).

4.3 Ahli badan profesional yang telah diwartakan layak untuk memohon kelulusan sebagai penyelesaian tertakluk kepada syarat-syarat yang ditetapkan.

## 5. PERMOHONAN UNTUK DILULUSKAN SEBAGAI PENYELESAI

### 5.1 SYARAT-SYARAT DAN KELAYAKAN BAGI PERMOHONAN UNTUK DILULUSKAN SEBAGAI PENYELESAI DI BAWAH SEKSYEN 433(4) AKTA 777

Syarat-syarat permohonan untuk diluluskan sebagai penyelesaian adalah seperti berikut:

- (a) Pemohon hendaklah merupakan warganegara atau pemastautin tetap di Malaysia;
- (b) Pemohon merupakan ahli badan profesional yang ditetapkan di bawah seksyen 433(5) Akta Syarikat 2016 serta mempunyai Sijil Amalan (*Practising Certificate*) yang sah;
- (c) Pemohon bukanlah seorang yang bankrap yang belum dilepaskan sama ada di dalam atau di luar Malaysia;
- (d) Pemohon hendaklah dalam tempoh lima (5) tahun sebelum permohonan dibuat tidak pernah disabitkan sama ada di dalam atau di luar Malaysia dengan mana-mana kesalahan yang melibatkan *fraud* atau ketidakjujuran yang, jika disabitkan, boleh dihukum dengan hukuman penjara selama tiga (3) bulan atau lebih;
- (e) Pemohon tidak pernah disabitkan dengan kesalahan berkaitan dengan promosi, pembentukan atau pengurusan sesuatu perbadanan;

- (f) Pemohon hendaklah memenuhi keperluan pengalaman kerja seperti berikut :
- (i) sekurang-kurangnya lima (5) tahun pengalaman kerja terkumpul secara sepenuh masa dalam amalan insolvensi. Pengalaman yang diperolehi sebelum keahlian dalam badan profesional yang diiktiraf boleh diambil kira;
  - (ii) Pemohon yang mempunyai pengalaman yang relevan tetapi tidak lagi menjalankan praktis dalam insolvensi boleh memohon sekiranya beliau;
    - a. tidak meninggalkan praktis dalam bidang insolvensi dalam tempoh tidak melebihi tiga (3) tahun dari tarikh permohonan; atau
    - b. bagi pemohon yang telah meninggalkan bidang insolvensi melebihi tiga (3) tahun, pemohon perlu kembali menjalankan praktis di Malaysia secara sepenuh masa sekurang-kurangnya satu (1) tahun sebelum mengemukakan permohonan.
  - (iii) Pemohon yang merupakan ahli badan profesional diiktiraf dan mempunyai pengalaman praktikal dalam insolvensi di luar Malaysia juga boleh dipertimbangkan tertakluk kepada syarat beliau mempunyai pengalaman praktikal insolvensi di Malaysia secara sepenuh masa sekurang-kurangnya satu (1) tahun sebelum mengemukakan permohonan;
- (g) Pemohon hendaklah mengemukakan surat penganjur (*sponsor letter*) daripada penyelesaian yang diluluskan yang bertanggungjawab menyelia kerja-kerja pemohon. Penganjur hendaklah bukan merupakan pelanggan (*client*) pemohon atau ahli keluarga. Surat penganjur hendaklah memberi keterangan berkaitan pengalaman pemohon, keupayaan pemohon menjalankan kerja-kerja insolvensi dan peranan beliau dalam kerja-kerja insolvensi yang dinyatakan; dan
- (h) Pemohon hendaklah mempunyai keupayaan (kapasiti) dalam menjalankan tugas sebagai pelikuidasi / penyelesaian syarikat.

(nota: Syarat-syarat bagi perenggan (a),(b),(c) dan (d) hendaklah dinyatakan dalam akuan berkanun yang ditetapkan).

## 5.2 TEMUDUGA

- a) Calon yang layak ditemuduga dinilai kompetensinya oleh Jawatankuasa Kelulusan Penyelesai Syarikat terhadap aspek berikut:-

Bil	Panel Agensi	Modul / Aspek Penilaian
1.	MIA	Kompetensi dalam aspek perakaunan bagi syarikat / entiti dan peraturan yang berkaitan.
2.	SSM	Akta Syarikat 2016 dan bidang kuasa sebagai penyelesaian.
3.	SC	Kompetensi berkaitan keperluan undang-undang atau peraturan bagi Entiti Berkepentingan Awam.
4.	Mdl	Kompetensi berkaitan praktis insolvensi meliputi aspek teknikal dalam penggulangan syarikat, penstrukturan semula syarikat dan mekanisme penyelamat korporat.

- b) Calon hendaklah memperolehi markah sekurang-kurangnya 60% (minima) bagi semua panel / modul penilaian untuk lulus temuduga;
- c) Bagi calon yang hanya gagal satu modul, calon berkenaan perlu mengulangi temuduga modul yang gagal sahaja dengan syarat markah yang diperolehi **tidak kurang daripada 50%** dan tempoh menunggu untuk temuduga berikutnya adalah selama **tiga (3) bulan**;
- d) Bagi calon yang hanya gagal satu modul, tetapi markah yang diperolehi **kurang daripada 50%**, calon berkenaan perlu mengulangi keseluruhan modul dan tempoh menunggu minimum untuk temuduga berikutnya adalah selama **enam (6) bulan**;
- e) Calon yang gagal **dua (2) modul dan ke atas** perlu mengulangi keseluruhan modul dan tempoh menunggu minimum untuk temuduga berikutnya adalah selama **enam (6) bulan**; dan
- f) Bagi calon yang **gagal kali kedua** bagi **para 5.2(c)**, calon berkenaan perlu mengulangi keseluruhan modul dan tempoh menunggu untuk temuduga berikutnya adalah selama **enam (6) bulan**.



### 5.3 SKEMA PEMARKAHAN UNTUK KELULUSAN PENYELESAI SYARIKAT

Bil	Skema Pemarkahan	Keputusan	Tempoh Tangguh	Catatan
1.	<b>Lulus</b> ( Markah $\geq$ 60% bagi setiap modul)	Lulus	Tidak berkaitan	Perlu lulus modul dari semua panel temuduga
2.	<b>Gagal 1 modul</b> - Markah marginal (50% - 59%)	Gagal	3 bulan	Menduduki semula modul yang gagal. Wajib lulus temuduga berikutnya, jika gagal, perlu menduduki semula semua modul temuduga.
	- Markah < 50%	Gagal	6 bulan	Perlu menduduki semula semua modul temuduga.
3.	<b>Gagal 2 modul dan ke atas</b> (Markah <60% bagi setiap modul)	Gagal	6 bulan	Perlu menduduki semula semua modul temuduga.

### 5.4 BAYARAN FI DAN TEMPOH KELULUSAN

- a) Kadar fi kelulusan Penyelesai ditetapkan di bawah Peraturan-Peraturan Syarikat (FI Juruaudit Syarikat dan Penyelesai) 2020;
- b) Bayaran fi kelulusan Penyelesai Syarikat adalah sebanyak **RM500.00 bagi tempoh sah selama dua (2) tahun;**
- c) Kelulusan Penyelesai adalah untuk tempoh **dua (2) tahun** sahaja melainkan jika dibatalkan lebih awal; dan
- d) Kelulusan Penyelesai boleh **diperbaharui** untuk tempoh **dua (2) tahun** berikutnya dengan bayaran pembaharuan kelulusan yang ditetapkan iaitu **RM500.00**.

## 5.5 KELULUSAN SECARA PRINSIP SEBAGAI PENYELESAI SYARIKAT

- a) Setiap calon yang lulus dalam temuduga akan diberikan surat kelulusan secara prinsip yang menjelaskan syarat pemohon hendaklah menjalankan praktis secara sepenuh masa.
- b) Bagi pemohon yang ingin membuka firma penyelesaian persendirian atau perkongsian, pemohon dikehendaki untuk memulakan praktis dalam tempoh (6) bulan dari tarikh surat kelulusan secara prinsip dikeluarkan.
- c) Bagi pemohon yang ingin menjadi rakan kongsi firma penyelesaian lain, pemohon hendaklah memulakan praktis dalam tempoh tiga (3) bulan dari tarikh surat kelulusan secara prinsip dikeluarkan.
- d) Bagi pendaftaran firma perkongsian penyelesaian yang baharu atau menjadi rakan kongsi kepada firma penyelesaian, semua rakan kongsi hendaklah:
  - i) merupakan penyelesaian yang diluluskan di bawah seksyen 433(4) Akta Syarikat 2016; dan
  - ii) memenuhi kelayakan untuk bertindak sebagai penyelesaian sepertimana peruntukan di bawah seksyen 433(1) Akta Syarikat 2016.
- e) Jenis firma penyelesaian yang dibenarkan bagi tujuan menjalankan praktis ialah :
  - i) Firma Bukan Audit (*Non-Audit Firm*) berdaftar dengan MIA; (*pendaftaran bagi penyelesaian yang merupakan ahli MIA/MICPA adalah tertakluk kepada Akta Akauntan 1967 dan MIA-By Laws*); atau
  - ii) Perkongsian Liabiliti Terhad (didaftarkan di bawah Akta Perkongsian Liabiliti Terhad 2012); atau
  - iii) Milikan Tunggal atau Perkongsian (didaftarkan di bawah Akta Pendaftaran Perniagaan 1956).

- f) Bagi tujuan perenggan e) (ii) dan (iii), pemohon dikehendaki mematuhi Pekeliling 1/2020: Nota Panduan Pendaftaran Firma Penyelesai Dan Makluman Kelulusan Sebagai Penyelesai Yang Diluluskan yang dikeluarkan Suruhanjaya Syarikat Malaysia.

#### **5.6 SIJIL KELULUSAN PENYELESAI SYARIKAT**

- a) Tertakluk kepada perenggan 5.5, sijil kelulusan akan dikeluarkan setelah maklumat-maklumat berikut dikemukakan oleh pemohon:
- i) Salinan Sijil Pendaftaran Firma Bukan Audit yang dikeluarkan oleh Institut Akauntan Malaysia; atau
  - ii) Salinan Sijil Pendaftaran Perniagaan / Sijil Pendaftaran Perkongsian Liabiliti Terhad yang dikeluarkan oleh Suruhanjaya Syarikat Malaysia; dan
  - iii) Cetakan Profil Perniagaan / Perkongsian Liabiliti Terhad yang telah disahkan oleh Suruhanjaya Syarikat Malaysia.

#### **5.7 NOTIFIKASI PENDAFTARAN SEBAGAI PENYELESAI YANG DILULUSKAN DENGAN SURUHANJAYA SYARIKAT MALAYSIA**

- a) Pemohon yang telah menerima Sijil Kelulusan Penyelesai Syarikat dikehendaki:
- i) mengemukakan satu notis kepada Pendaftar Suruhanjaya Syarikat Malaysia bagi memaklumkan berhubung kelulusan tersebut dalam tempoh 30 hari dari tarikh sijil dikeluarkan; dan
  - ii) mengemaskini mana-mana maklumat yang perlu dikemukakan melalui notis tersebut dalam tempoh 30 hari dari tarikh perubahan maklumat.

### **6. PEMBAHARUAN KELULUSAN SEBAGAI PENYELESAI SYARIKAT**

#### **6.1 SYARAT DAN KELAYAKAN PERMOHONAN PEMBAHARUAN KELULUSAN SEBAGAI PENYELESAI SYARIKAT**

- a) Pemohon hendaklah merupakan penyelesai yang diluluskan di bawah seksyen 433(4) Akta Syarikat 2016 dan tidak hilang kelayakan sebagai penyelesai syarikat.
- b) Pemohon hendaklah memenuhi syarat-syarat asal dan lain-lain syarat seperti berikut:

- i. Pemohon merupakan ahli badan profesional yang ditetapkan di bawah seksyen 433(5) Akta Syarikat 2016 serta mempunyai sijil amalan (*Practising Certificate*) yang sah;
- ii. Pemohon bukanlah seorang yang bankrap yang belum dilepaskan sama ada di dalam atau di luar Malaysia;
- iii. Pemohon tidak pernah disabitkan sama ada di dalam atau di luar Malaysia dengan mana-mana kesalahan yang melibatkan *fraud* atau ketidakjujuran yang, jika disabitkan, boleh dihukum dengan hukuman penjara selama tiga (3) bulan atau lebih;
- iv. Pemohon tidak pernah disabitkan dengan kesalahan berkaitan dengan promosi, pembentukan atau pengurusan sesuatu perbadanan;
- v. Pemohon dikehendaki mematuhi **syarat khusus** yang ditetapkan oleh agensi kawal selia yang berkaitan<sup>1</sup> dan agensi tersebut (MIA, SC, SSM dan Mdl) perlu menyokong permohonan pembaharuan.

*(nota: Syarat-syarat pembaharuan bagi perenggan (ii), (iii) dan (iv) hendaklah dinyatakan dalam akuan berkanun yang ditetapkan).*

- c) Permohonan pembaharuan kelulusan hendaklah dikemukakan dalam tempoh tiga (3) bulan sebelum tamat tempoh kelulusan terdahulu.
- d) Sekiranya permohonan dikemukakan lewat dari tarikh tamat tempoh kelulusan terdahulu, tempoh kelulusan baharu tidak akan bersambung dan tarikh kelulusan baharu adalah berdasarkan tarikh pembaharuan kelulusan diberikan.
- e) Sekiranya permohonan pembaharuan gagal dikemukakan dalam tempoh satu (1) tahun selepas tamat tempoh kelulusan terdahulu, pemohon dikehendaki untuk mengemukakan permohonan kelulusan baharu sebagai penyelesaian dan perlu menjalani semula sesi temuduga.

---

<sup>1</sup> Agensi Kawal Selia berkaitan terdiri daripada Suruhanjaya Syarikat Malaysia (SSM), Institut Akauntan Malaysia (MIA), Suruhanjaya Sekuriti (SC), dan Jabatan Insolvensi Malaysia (Mdl).

## 7. PEMBATALAN / PENARIKAN BALIK KELULUSAN SEBAGAI PENYELESAI

- 7.1 Sebarang proses pembatalan atau penarikan balik kelulusan penyelesaian akan dibawa kepada Jawatankuasa Pengawas Juruaudit dan Penyelesai Syarikat untuk pertimbangan selanjutnya.
- 7.2 Jawatankuasa Pengawas Juruaudit dan Penyelesai Syarikat berhak mendapatkan penjelasan atau surat tunjuk sebab daripada penyelesaian bagi sebarang aduan atau salah laku.
- 7.3 Akauntan Negara Malaysia melalui kuasa yang diwakilkan oleh Menteri Kewangan berhak untuk mempertimbangkan pembatalan kelulusan penyelesaian berdasarkan peruntukan di bawah seksyen 433(4A), Akta Syarikat 2016.

## 8. HAL-HAL LAIN

Pertanyaan lanjut mengenai Garis Panduan Kelulusan Sebagai Penyelesai, boleh dirujuk kepada pihak berikut:

Pengarah  
Bahagian Pembangunan Perakaunan dan Pengurusan  
Jabatan Akauntan Negara Malaysia  
Aras 6 & 7, Kompleks Kementerian Kewangan  
No.1, Persiaran Perdana  
62594, Presint 2,  
Putrajaya

Untuk perhatian : Unit Kawal Selia Juruaudit dan Penyelesai Syarikat  
Emel : [ukp@anm.gov.my](mailto:ukp@anm.gov.my)  
No.tel : 03-8882 1118/1695/1194

## 9. TARIKH KUATKUASA

Garis Panduan ini berkuat kuasa mulai pada tarikh ianya diperakui.

Diperakui oleh,

  
(DR. YACOB BIN MUSTAFA C.A(M))  
Akauntan Negara Malaysia

21 Januari 2020